

Informasjon om hjortejakta 2025

Hjortejakta nærmar seg og som tidlegare år sender vi hermed informasjon om jakta til leiarar i valda.

Som leiar av eit vald er du ansvarleg for at informasjonen i dette brevet vert delt med jegerane som jaktar i ditt område. Vedlagt er eit årshjul over valdleiar sine arbeidsoppgåver gjennom året.

Oppsummering av viktig informasjon:

- Alle vald må ha på plass ettersøksavtale før jakta startar. Ved private avtalar (dvs ikkje med ettersøksringen) skal avtalen sendast til kommunen.
- Fellingsrapport skal leverast av valdleiar **innan tysdag 6. januar 2026**. Fellingsrapport leverast på skjema eller digitalt gjennom hjorteviltregisteret. Det skal informerast om kjønn og alderskategori på alle felte dyr, **inkludert kalv skote på kvotefri jakt**. Det forventast at jeger undersøker kjeven på felte dyr for å rapportere inn rett alderskategori.
- Alle godkjente vald kan nytte seg av kvotefri jakt på kalv.
- **Det skal leverast kjevar frå eldre hjort (2,5 år og eldre) til aldersbestemming etter jakta 2025. Dette leverast med utfylt kjevelapp til kommunen innan fredag 16. januar 2026.**
- Kjevelappar kan hentast på Heradshuset mot slutten av veke 33 eller seinare.
- Merka dyr kan fellast. Sjå eigne rutinar ved felling av merka hjort eller tilhøyrande kalv.
- Hjort med hudvorter skal rapporterast med bilde til kommunen med informasjon om stad, fellingsdato, aldersgruppe, kjønn og kondisjon.
- Fellingsavgifta i Gloppen er:
 - Vaksen: kr 416
 - Kalv: kr 78
- Ettersøksavgift ved avtale med ettersøksringen: kr 130 per dyr.

Jakttida

Jakttida for hjort er 1. september til og med 23. desember.

Ettersøkshund / Ettersøksavtale

Alle jaktlag og personar som jaktar åleine, skal ha tilgang på godkjent ettersøkshund. Ei avtale må vere på plass innan jaktstart. Storvald kan teikne ei kollektivavtale for heile valdet (alle jaktfelte). Gloppen ettersøksring tilbyr 1- og 3-årige avtaler. Ta kontakt med Alf Erik Røyrvik for avtaleskjema.

Jaktfelt og vald som vil nytte seg av private hundar har høve til det. Kopi av avtale med godkjent ettersøkshund må sendast til kommunen innan jakta startar. Liste over godkjente hundar og eigarar er tilgjengeleg på [Norsk Kennel Klub sine nettsidar](#).

Informasjon frå ettersøksringen om kva ein skal gjere om dyret ikkje dett etter skot er vedlagt.

Vald som har avtale med Gloppen ettersøksring får krav om innbetaling av ettersøksavgift på same faktura som fellingsavgifta frå Gloppen kommune. Vaktliste for ettersøksringen vil bli publisert på kommunen sin heimeside www.gloppen.kommune.no innan jaktstart.

Sett og felt hjort

Alle jaktfelt som jaktar skal registrere sett og felt hjort i appen «sett og skutt» eller gjennom www.hjorteviltregisteret.no. Dette er enkelt å bruke og alt ein treng for å logge inn er jegernummer og fødselsdato. **Hugs å føre inn alle jakt dagar, inkludert dei dagane det ikkje vart sett hjort.**

Om alle felte dyr vert registrert i Hjorteviltregisteret gjer det valdleiar sin jobb enklare og valdet kan levere digital fellingsrapport til kommunen i etterkant av jakta.

Fellingsløyve og fellingsrapport

Frist for å levere fellingsrapport er **tyrsdag 6. januar 2026**. Det er valdansvarleg/valdleiar som skal rapportere for heile valdet – ikkje leiar av jaktfelt. Fellingsrapport skal leverast digitalt eller i tabellen nedst på fellingsløyve. Vald utan felte dyr skal informere om dette skriftleg.

På grunn av rapportering vidare til Statistisk sentralbyrå er det særskilt viktig at fristen vert overhalden.

Digital fellingsrapport i Hjorteviltregisteret

Valdansvarleg kan levere fellingsrapporten digitalt gjennom Hjorteviltregisteret viss alle felte dyr er registrert inn. **Valdansvarleg må kontrollere at alle felte dyr er registrert** før fellingsrapport kan leverast. Alle jaktdagar og felte dyr må godkjennast av valdansvarleg i Hjorteviltregisteret før den elektroniske fellingsrapporten kan leverast (sjå vedlagt rettleiar).

Når digital fellingsrapport er levert får valdleiar tilsendt kvittering på e-post. **Fekk du ikkje e-post? Sjekk med kommunen om fellingsrapporten er levert.**

Merka hjort kan fellast – egne rutinar felt merka hjort eller tilhøyrande kalv

Alle GPS halsbanda i merkeprosjektet «Vesthjort» skal no ha falt av, men desse dyra er framleis merka med øyremerke. Om de feller merka hjort eller tilhøyrande kalv skal skjemaet «[felt merka hjort](#)» fyllast ut. Dyret må i tillegg bli nøyaktig vege, kjeve takast ut og reinskjerast, og eit øyre skal leggst i ein plastpose og frysast. NIBIO ønskjer og posisjon for felling på kart.

Kvotefri jakt på kalv

Alle godkjente vald i Gloppen kan nytte seg av kvotefri jakt på kalv. Kvotefri jakt på kalv kjem i tillegg til tildelte løyve. I praksis kan kvar enkelt grunneigar/jaktrettshavar felle eit fritt tall kalvar på sin eigendom, men kan og gi løyve til andre. Det er anbefalt at grunneigarar rettar seg etter valdet sine føringar om dispensasjonen. Meir informasjon, samt spørsmål og svar, ligg på [hjortevilt.no](#).

Jaktleiar, eventuelt jeger/jaktrettshavar, er ansvarleg for at alle felte kalvar, inkludert dei som er felt som fri kalv, rapporterast inn. Valdleiar er ansvarleg for å sende inn fellingsrapporten som inkluderer all felt hjort. Det skal betalast fellingsavgift for alle felte dyr, inkludert eventuelle ekstra kalvar.

Kvifor skyte kalv? Kalven har naturleg høgare dødelegheit, spesielt gjennom ein hard vinter. Hjorteviltbestandane er frå naturens side tilpassa eit høgt uttak av kalv. Ved høg bestandstettleik er det ofte ungdyra (kalven frå hausten før) som taper i beitekonkurransen på sommaren. Eit høgt uttak av kalv vil gje betre levevilkår til overlevande ungdyr sommaren etter.

Kommunale mål om alder, vekt og kjønnsfordeling.

Produksjonsdyra av begge kjønn er viktige og det er eit mål om å auke snittalderen i kommunen. Det er difor viktig å ha fokus på å ta ut ein større del kalv og ungdyr og la dyr i sin beste alder få gå.

Det er eit mål om å auke slaktevektene til dyra, og då må uttaket fokusere på dei minste dyra av begge kjønn. Det er mange som vegrar seg for å skyte fjorkolle fordi det kan vere ei lita kolle på 2,5 år. Alle kan ta feil og ein må ikkje la vere å skyte ei lita kolle sjølv om ein er usikker på alder.

Ved høgt uttak av kalv og ungdyr er det viktig å halde eit høgt jakttrykk for å unngå vidare auke i bestandstettleiken. Sjølv om sett kolle per bukk syner gode tal på bukk, er fordelinga skeivt fordelt i kommunen og på generelt grunnlag er det difor viktig å halde eit kjønnsnøytralt uttak, og aller helst ha ei overvekt av koller i uttaket i dei fleste valda.

Kjeveinnsamling/kontroll

Etter at Gloppen kommune vart teke ut av overvakingsprosjektet til NINA vart det bestemt at det skal samlast inn kjevar frå jakta som skal sendast til aldersbestemming tredje kvart år. Det skal difor leverast inn kjevar i 2025.

Det skal berre leverast kjevar frå eldre felt hjort (2,5 år og eldre). Det er forventat at jeger sjekkar kjeve på alle felte dyr for å vere sikker på om dyret er kalv, ungdyr eller eldre. Kjevane skal merkast skikkeleg med vald nr. og jaktfelt nr. og elles dei opplysningane det er spurt om på merkelappen. Slaktevekt er ei særskild viktig opplysning og skal vere med på kjevelappen.

Underkjeven skal vere gjort rein for kjøt og tørka. Berre den eine halvdel av kjeven skal leverast inn. Ikkje heile kjeven. Vi ber difor om at den eine kjevedelen vert kutta av på ein slik måte at framtennene vert med saman med bakre kjevedel. Utan framtenner og heile kjevelengda er det avgrensa informasjon ein kan få ut av kjeven.

Kjevar skal leverast inn på Gloppen kommune på Heradshuset innan fredag 16. januar 2026. Gje beskjed om du ikkje klarar å nå fristen. Kjevelappar er tilgjengeleg på Heradshuset.

Fellingsavgift

Etter at retningslinene for viltfondet blei reviderte i 2021, vart satsen for vaksen hjort 4/5 av maks sats og for kalv vart den ¼ av maks sats. Makssats for fellingsavgift er i 2025 kr 520,- for vaksen hjort (1,5 år og eldre) og kr 310,- for kalv. Satsen for 2025 i Gloppen kommune blir difor kr 416,- for vaksen hjort og kr 78,- for kalv. Avgifta vert innkravd med faktura frå kommunen.

Leiarskifte i jaktfelt og vald

Dersom jaktfelt eller jaktvald vel ny leiar, skal kommunen få melding om dette. Kommunen skal alltid ha oppdatert informasjon om valdansvarleg (namn, postadresse, e-postadresse og telefonnummer).

Hjortevorter

Vi har hatt nokre få førekomstar av hudvorter hos hjort i vår kommune. Hudvorter skuldast infeksjon i huden med vortevirus (papillomavirus). Vortene smittar frå dyr til dyr, men dei kan ikkje smittast over på andre artar enn hjorten, det vil sei at **den ikkje smittar til menneske eller andre dyreslag.**

Vortene førekjem enten enkeltvis, i grupper, eller meir sjeldan spreidd utover heile kroppen (generalisert form). Hudvorter er normalt godarta, men ved generalisert form med store mengder vorter på kroppen, kan dyret lide og det kan utvikle seg infeksjonar eller andre sekundære sjukdommar. Slike dyr bør ein vurdere å avlive grunna dyrevelferd.



Dyr med hudvorter som vert felt under jakt, **kan godkjennast som mat** dersom dyret er i normalt hald, og ikkje har andre teikn på sjukdom. **Dyr som har den generaliserte forma, og i tillegg er avmagra, bør avlivast av dyrevernsyn og kasserast som menneskemat.**

Veterinærinstituttet v/ViltHOP overvakar utbreiinga av vorter hjå hjort sidan dette er ein førehaldsviss ny sjukdom her i landet. Hjort med hudvorter skal rapporterast til kommunen med bilede, informasjon om stad, fellingsdato, aldersgruppe, kjønn og kondisjon.

Meir informasjon: <https://www.vetinst.no/sykdom-og-agens/fibropapillomatose>

Skrantesjuka

Skrantesjuka (CWD) blei påvist for første gang i Europa i april 2016 hjå ein villrein i Lærdal. Skrantesjuka rammer berre hjortedyr og det skal ikkje vere fare for smitte til menneske.

Symptom på at ein hjort er smitta med skrantesjuka:

- Unormal oppførsel
- Hyppig urinering
- Avmagring
- Ukoordinert rørsle
- Sikling
- Senka hovud

Alle som feller eller observerer hjort som dei mistenker kan vere smitta av skrantesjuka, skal melde frå til mattilsynet (tlf. 22 40 00 00) og gjerne informere kommunen (SMS til tlf. 48 18 91 12).

Meir info om skrantesjuka finst på heimesida til Hjortevilt: <http://www.hjortevilt.no/skrantesjuka/>

Rådyr

Dersom de ser rådyr under jakta, vil vi på landbrukskontoret gjerne ha melding om dette.

Skitt jakt, med høg fellingsprosent og balansert uttak!

Vennleg helsing

Lindis Bergland Østgård
utmarksforvaltar

Dokumentet er elektronisk godkjent og har ingen signatur